

Nowodhow an Seythen

19/01/09

Wosa kaskyrgh hir a strivya erbynn degeans Klavji Sen Myhal yn Heyl... y teu nowodhow bos hwegh milvil peuns gorrys ynno.

Res yw dhyn perthi kov a'n dus re omladhas erbynn an towl na... deg mil warn ugens a geskerdhas dres an stretys yn unn grodhvolas.

Esel Senedh Westminster rag Porthia, Andrew George, a wra wolkomma hemma... byttegyns ev a lever bos striv hwath rag gwitha gonisyow orth Klavji Kernow West.

Yma own dhodho meur a oberennow a vydh gwrys dhe Drelysk yn y le.

**

Skoodhoryon an Vorladron a gesvetyas nos Lun yn Pennsans rag klewes towl an klub govyn orta moy a vona.

Yma edhom dhe'n para kavos hwegh kans mil peuns may hallo dos ha bos esel a'n Gamporyeth.

Honna yw bagas nowyth a barys dhyworth Kenedhlek Onan dre vras.

Kaderyer an Vorladron Dickie Evans re skoodhyas an klub gans y arhans y honan rag tredhek bledhen... ha lemmyn yma edhom dhodho kavos skoodhyans gwell dhyworth tus erel.

Byttegyns... yma ev ow leverel bos hwans dhodho a geworra an keth amont yw degemmerys dhyworth skoodhoryon.

A-darr kavos tyller y'n Gamporyeth, An Vorladron a garsa dos ha bos esel a'n Magners League ynwedh.

An bagas na yw gwrys a barys Keltek a-hys powyow Keltek erel.

**

Nyns yw saw an Vorladron usi ow hwithra mona nowyth.

Yma Skol Bolitho gans edhom a hanter milvil peuns.

Yma ow kovyn orth kerens an dhyskiblon moy a arhans awos an arhantti dhe gildenna an overdraft.

**

Ha ple'th a an gwenili y'n gwav?

Wel, y koodh dhedha nejyja tro ha Afrika Dyhow.

Byttegyns peder anedha a wortas yn Kernow a'n prys ma... martesen awos aga bos mar yowynk.

Gwelys vens orth Marhas Yow gans an RSPB.

Dell grys gwithyas an naturva ena... ny wrug saw onan anedha bewa dres an seythennow oor wosa an vledhen nowyth.

**

Henn yw oll rag an seythen ma - agas gweles nessa seythen.